

## **Thò Baiq Da Pêtrô 2 Pêtrô Bàu Patô Adroi**

*Hiniq wa Bàu Xèm Da Sech:*

Mangai yõc nhàn thò cô hadai mangai lùì Chuaq chiùq nan xa. Pêtrô pa'yèp wì haq biac mangai hnài amòng.

*Mangai Achih wa Hanam Achih:*

Mangai achih: Simôn Pêtrô. Haq achih bàu: "Paulô oh daq loq waq da bèn". Khoi achih hanam 66 Atiq C.

*Bàu Anoi:*

Pêtrô tiah ca Mangai Gòm Triu da Crich. Haq hnài mangai tiaq Chuaq phai canao loq ca mangai hnài amòng. Haq hnài wì haq phai yõc manoh lùì cajap wa broq biac lem am ca Chuaq. Èh Chuaq Jêxu joq 'nàng tawih hlài ta crõng taneh.

*Rìm 'Nat:*

1. Bàu Baxèm: 1:1-2
2. Yõng Càn Lam Trong Chuaq: 1:3-11
3. Bàu Anoi Hnài Da Pêtrô: 1:12-21
4. Bàu Pa'yèp Tajraq Hlài Mangai Hnài Amòng: 2:1-22
5. Chuaq Jêxu Tawih Hlài Ta Crõng Taneh: 3:1-16
6. Bàu Pulùch: 3:17-18

*Bàu Bòch Hmàih*

<sup>1</sup> Au cô Simôn Pêtrô hapǒng wa mangai sùq đô da Chuaq Jêxu Crich,

Achìh thò cô ca 'bài mangai khi jah nhàn yǒc manoh lùì tìah ca nhèn nhò biac ta-atoq da Boc Plình wa da Chuaq Jêxu Crich, Mangai Dêch bèn.

<sup>2</sup> Waiq xìn biac am dech, biac catèm, jah tǒc tam ca pì, nhò biac pì canao loq ca Boc Plình wa Chuaq Jêxu Crich, Chuaq da bèn.

<sup>3</sup> Taiq cwìang itai Boc Plình khi am ca bèn rìm biac nhet òiđiq rìh wa i can rìh hadròih, nhò canao loq ca Haq ma creo ca bèn xam can 'ngah 'ngai wa biac khôn khaoq da Haq. <sup>4</sup> Taiq 'màng aih, Haq am ca bèn bàu hùaq òiđiq jaq càn wa canaq, nhò enh aih pì khi claih ca biac ham enh da crǒng taneh, jah wìa mangai i manoh tìah troi manoh Boc Plình.

### *Biac Yòng Càn da Con Caiq Chuaq*

<sup>5</sup> Taiq 'màng aih, phai ran ta manoh 'mùt tam manoh lùì, biac khôn khaoq, tam ca biac khôn khaoq, biac loq 'nì, <sup>6</sup> tam ca biac loq 'nì, biac pagàt dađeh, tam ca biac pagàt dađeh, biac dràng cajap, tam ca biac dràng cajap, can rìh hadròih, <sup>7</sup> tam ca biac can rìh hadròih, biac loq xa-öch ca oh daq, wa tam ca biac loq xa-öch ca oh daq, can loq waq. <sup>8</sup> Taiq tàng òiđiq ca biac aih i tǒm gêh ta pì, wa bình halùih hòm, èh ùh hìaq òiđiq òi dech, ùh loh plì ta biac canao loq ca Chuaq Jêxu Crich da bèn. <sup>9</sup> Taiq mangai leq thiùq ca biac aih, haq mangai hnoq ùh hangai, ùh xao mat, wa hèt ca dađeh khi jah Chuaq broq hreo đac ca tǒiq lôì enh nèh.

<sup>10</sup> 'Màng aih, ôi oh daq! Phai ran broq waq ca biac creo da Haq, wa biac jah raih da pì jah cajap, ma jah 'màng aih tàng pì broq 'màng aih, èh ùh jò leq tacro, <sup>11</sup> nhò 'màng aih trong mùt ta Diac Plình ỏi hloi hloi da Chuaq Jêxu Crich, jah pèh 'màng rùng rai ðòiq ðìh yốc pì.

<sup>12</sup> 'Màng aih 'nhac ca pì loq ro, wa khoi jah cajap ta biac joq 'nàng troi manaiq, mahaq au xôq bahmàng hlài pì biac aih ùh hêq. <sup>13</sup> Mahaq jò au ỏi ỏi ta hnem chac hamac ỏi ðò cô pàng leq, èh au pariaq hnài wa bahmàng pì biac cô, aih troq. <sup>14</sup> Ma jah 'màng aih Chuaq Jêxu Crich bèn khoi doi ca au loq ùh dùnh toq leq hòm au cađac hnem chac hamac ỏi ðò cô. <sup>15</sup> Mahaq au phai ran ỏi pariaq hnài pì, ðòiq atiq ca au cachit, pì jah hmàng ca bàu au khoi doi.

<sup>16</sup> 'Màng aih jò nhèn anoi ca pì loq cwiang itai wa biac trùh hlài da Chuaq Jêxu Crich bèn, ùh xài nhèn tiaq bàu 'mon ùh troq, mahaq mat cla nhèn khoi hnoq biac 'ngah 'ngai da Haq. <sup>17</sup> Ma jah 'màng aih Haq khoi nhàn yốc cwiang itai wa can 'ngah 'ngai enh Boc Plình, Baq Haq, jò i bàu enh nòi ðìq jaq ha'nhèq doi ca Haq: "Cô Con Au ma loq waq, Haq lem manoh Au rìm trong."✧ <sup>18</sup> Nhèn hadai khoi tàng bàu aih loh enh plình, jò nhèn ỏi ti Haq ta wang hadròih.

<sup>19</sup> 'Màng aih, nhèn lùì bàu 'bài mangai capoch thai Boc Plình ta Sech Hadròih cajap ji hnao hòm, aih bàu ma pì phai ngan, tìah ca ðen xreo 'ngah ta nòi clam clòiq, trùh jò leq dahì mahno loh, wa halống daxroq jah tốc ta manoh pì. <sup>20</sup> Adroi

---

✧ **1:17** 1:17 Mat 17:5; Mốc 9:7; Luc 9:35.

dồng bèn phai loq ro rang, ùh i ca bàu mangai capoch thai Boc Plình leq ta Sech Hadròih ma yóc dèh manoh cla òiòiq anoi hnài. <sup>21</sup> Ma jah 'màng aih ùh i ca bàu mangai capoch thai Boc Plình leq trùh enh manoh mangai, mahaq aih nhò Yiang Hadròih broq ta manoh wì haq, òiòiq wì haq jah capoch tiaq bàu Boc Plình.

## 2

### *'Bàì Thài Amòng*

<sup>1</sup> Calah nèh i mangai amòng capoch bàu loq adroi ta Diac Yothaiq, manàiq hadai i thài amòng ta pì, wì haq hnài ðaoq 'nùt òiòiq broq waq ca raliang biac Chuaq, chôiq ðac Chuaq khoi rôt wì haq, 'ràng biac raliang ma renh ca daðeh. <sup>2</sup> I bàc ngai tiaq trong manhài trài 'mèq 'mac da wì haq, taiq wì 'màng aih èh trong biac joq 'nàng 'bìq capoch halê. <sup>3</sup> Wì haq taiq manoh loq ham, capoch bàu amòng òiòiq padô yóc cùng hang pì, mahaq biac baxa khoi dùnh gòm òiòiq wì haq, wa biac raliang caðac wì haq ùh cùi.

<sup>4</sup> 'Màng aih tàng Boc Plình ùh baxống ca 'bình plình jò wì haq broq tôiq, mahaq hwenh ðac wì haq ta 'bau ùnh, ta nòi clam clôiq, ta aih Boc Plình càt òiòiq wì haq xam caxi mem tagwat, gòm hì hadrah. <sup>5</sup> Haq hadai ùh baxống ca crống taneh calah nèh, mahaq thê diac càn trùh jêh caðac 'nhòng ngang dù aih. Haq òiòiq toq Noah thài anoi hnài ta-atoq, wa tapèh ngai mangai 'noiç; <sup>6</sup> tàng Haq khoi hadrah baxa phòq Sôðôm wa Gô-mô-ra, bùh ðac baiq phòq aih loh blo, òiòiq broq dua ca 'bài mangai ngang dù 'nah ta

atìq; <sup>7</sup> wa tàng Haq khoi dõih dèch Lot, mangai caq òi ta-atoq, aih mangai loq mango taiq biac caq òi manhài trài da 'bài mangai ngan dù tau. <sup>8</sup> Ma jah 'màng aih mangai ta-atoq cô òi ta'ne wì haq hnoq biac ngang dù da wì haq broq, èh rìm hì haq chiuq xalep dìq jaq ta manoh; <sup>9</sup> èh Chuaq loq dõih dèch 'bài mangai ma loq canòm ca Haq claih ca biac padô 'nùt, hi khoi clêh òi q 'bài mangai ma rìh ùh ta-atoq òi q baxa ta hì hadrah; <sup>10</sup> aih 'bài mangai lam tiaq dèh manoh ham enh trong chac xech 'mèq 'mac, khìn đac wì ma wèq cwìang.

'Bài aih catèh dađeh, ùh hìaq loq yùq capoch 'mèq ca 'bình plình 'ngah 'ngai, <sup>11</sup> 'nhac ca 'bài 'bình plình i can dèh wa i cwìang itai yi hnao ca wì haq, xôq ùh yõc bàu hanip òi q kian wì haq enh ngĩa ca Chuaq. <sup>12</sup> Mahaq wì haq tìah ca ngè aban ùh 'nì cleq, xa-ông loh òi q 'bìq raliang cađac, hùa capoch 'mèq biac wì haq ma ùh 'nì, èh wì haq 'bìq hù hnhung taiq can ngang dù da wì,

<sup>13</sup> wì haq rìh ngang dù, 'màng aih jah ca'naih hlài da wì haq biac ngang dù. Wì ngan biac ham caq ham ôq dahì aih biac lem bùi. Wì haq padô 'nùt pì 'nang broq teo camaih wa teo amùa amech jò ha'ngui acaq hiniang da pì. <sup>14</sup> Ta mat wì haq bình halùih biac tango anang broq tôiq ùh i ca jò leq loq mech, padô adràc 'bài mangai ùh cajap manoh. Wì haq i manoh loq ham enh, aih 'bài con caiq đang ca waiq hanip. <sup>15</sup> Wì haq khoi cađac trong jang, lam trong ùh troq, lac tiaq trong da Ba-la-am, con calô Bêô, aih mangai ham

ca 'bac cùng da biac ngang dù, <sup>16</sup> mahaq Ba-la-am 'bìq trech taiq biac ùh troq ma haq broq, èh i mòiq toq con lùa loq capoch bàu mangai, tạt đac biac broq ranhùa da mangai pajàu loq adroi aih.

<sup>17</sup> 'Bàì aih tìah ca tamõc ùh i ca diac, tìah ca hiloc 'bìq cayeo dêh 'nong lam, biac clam clôiq hapinh hapàt khoi gòm òiôiq wì haq. <sup>18</sup> Wì haq yõc bàu capoch jìang, capoch ra'ngòt ùh i ca lòiq cleq, padô ta adràc nhò ham enh chac xech wa biac manhài trài, wì ma neo wia khoi ðeh ca biac tôiq lôì. <sup>19</sup> Wì haq hùaq am biac ùh tawac ùh pakènh ca con mangai, mahaq cla wì haq broq dích hapõng ca biac manhài trài. Ma jah 'màng aih, tàng con mangai òiôiq biac cleq khoi ta'blêq ca daðeh, èh haq broq dích hapõng ca biac aih. <sup>20</sup> Tàng wì haq nhò biac canao loq ca Chuaq Jêxu Crich, Mangai Dèch, wì jah claih khoi ca tôiq lôì da crõng taneh, khoi èh xôq õi tawìh hlài ta tôiq lôì, broq hapõng ca tôiq lôì mòiq yàng hòm, èh 'nah ta atìq calõih wì haq 'mèq yì hnao ca adroi nèh. <sup>21</sup> Tàng wì haq ùh lah loq 'nì ca trong ta-atôq, aih yì lem ca wì haq loq, èh tawìh crõng cađac bàu thê hadròih ma khoi 'noh am ca wì haq. <sup>22</sup> Wì haq joq troq troi bàu ma khoi capoch: “Coq liah hlài dèh hac,”<sup>☆</sup> “chùa 'nheo khoi hreo, èh loh ca tàmm hlài ta tráp.”

### 3

#### *Hì Hadrah da Chuaq*

<sup>1</sup> Ôi oh daq au ma loq waq, cô thò yàng baiq au achìh ca pì: Thò cô hadai tìah ca thò yàng adroi,

<sup>☆</sup> 2:22 2:22 BR 26:11.

đòiq bahmàng hlài wa parông manoh hèm lem da pì. <sup>2</sup> Au enh oh daq hmàng hlài đìq ca bàu da mangai hadròih capoch thai Boc Plình khoi anoi adroi, wa bàu thê da Chuaq Jêxu Crich Mangai ma Dèch bèn, khoi anoi 'noh nhò nhèn mangai sùq đô Haq.

<sup>3</sup> Adroi đống đìq bèn phai loq, ta 'bài hì atìq lùch cô èh, i bàc ngai trùh capoch bàu do halê, aih 'bài mangai caq ỏi tiaq trong ham enh dađeh, <sup>4</sup> wì haq doi: “Bàu ma hùaq ca biác trùh hlài da Chuaq ta leq? Ma jah 'màng aih enh jò boc yaq bèn cachìt, rìm biác ta crông taneh xôq tìah ca jò baxèm i plình crông taneh.” <sup>5</sup> Wì haq to hèt cađac calah nèh, nhò bàu Boc Plình men i plình crông taneh, taneh loh enh diac khoi broq wìa ỏi ta'ne diac, <sup>6</sup> crông taneh jò aih taiq diac làn ma 'bìq raliang cađac. <sup>7</sup> Mahaq plình crông taneh manàiq, hadai nhò bàu Haq ma ỏi padon đòiq ca ùnh; gòm trùh hì hadrah jah raliang cađac 'bài mangai ngang dù.

<sup>8</sup> Mahaq ô 'bài mangai au ma loq waq, apaq hèt ỏi enh ngìa ca Chuaq, mòi q hì tìah ca mòi q ngông hanam, mòi q ngông hanam tìah ca mòi q hì. <sup>9</sup> Chuaq ùh adia ca biác Haq hùaq broq, tìah ca mòi q 'nah ngai khoi hèm, mahaq Haq khoi yóc dèh manoh chiuq àt dài pì. Haq ùh enh ca mòi q ngai leq cachìt hnhung, mahaq Haq enh rìm ngai jah canao loq wa cađac dèh manoh broq tôiq lòi.

<sup>10</sup> Hì da Chuaq jah trùh tìah ca mangai atùng. Jò aih ta plình i atêh càn tagrùang tagrât, hi khoi

hnhung cađac taneh wa diq ca biac ma rih ôi ta crông taneh, ùnh bùh đống diq.

<sup>11</sup> Taiq rìm biac èh phai raliang đống diq xam ùnh, èh pì phai wih wìa mangai 'màng leq? Pì phai rih mòiq 'nhòng rih hadròih wa caq ôi lem tiaq manoh enh Boc Plình, <sup>12</sup> jò bèn gòm ngèh ca hì da Chuaq renh trùh, aih hì diq ca plình jah bùh cađac wa rìm biac ta aih cheo đống diq.

<sup>13</sup> Mahaq tiaq bàu hùaq da Chuaq, bèn gòm plình neo, taneh neo nòi toq i biac ta-atoq hêq.

<sup>14</sup> 'Màng aih èh ôi oh daq au ma loq waq, taiq pì ngèh gòm biac aih, èh phai wèq dađeh đòiq ùh i ca teo, ùh i ca xit, ùh i ca nòi jah trech enh ngìa ca Chuaq. <sup>15</sup> Phai ngan loq ro rang biac chiuq àt dùnh yôh da Chuaq, aih đòiq jah dèch claih, tìah ca Paulô oh daq bèn loq waq, nhò biac khôn rabiaq Boc Plình am, khi aichì thò ca pì. <sup>16</sup> Ta rìm capiac thò haq capoch hlài biac aih, i 'nah nòi xa ca 'nì loq, biac ma 'bài mangai awàt yóc capoch liq, tìah ca wì haq khi anoi hlài ùh troq ta 'bài Sech Hadròih ma 'noi, broq ca dađeh 'bìq hù hnhung.

<sup>17</sup> Taiq 'mang aih, ôi oh daq ma au loq waq, pì khi jah loq adroi diq ca biac cô, phai wèq dèh manoh oq đòiq pì ùh hìaq 'bìq padô 'nùt ta bàu capoch rangot ùh troq da mangai ngang dù, broq ca pì pi jah yòng cajap. <sup>18</sup> Mahaq phai yòng càn ta biac am dech, wa biac 'nì loq ro ca Chuaq Jêxu Crich, Mangai Dèch bèn. Waiq xin biac 'ngah 'ngai am ca Haq enh jò cô trùh hloi hloi. Amen.



**Sech Hadròih**  
**Sech Hadròih**

copyright © 2020 Wycliffe Bible Translators, Inc.

Language: Hre

Contributor: Wycliffe Bible Translators, Inc.

Published: 2015 Nhà Xuất Bản Tôn Giáo

All rights reserved.

2020-11-17

---

PDF generated using Haiola and XeLaTeX on 22 Feb 2024 from source  
files dated 29 Jan 2022

e5023a07-9831-5256-a315-1cae0f33043d